

DISSERTATIO  
JURIS PUBL. PRUTENICI,  
DE  
UNIONIS, QVA  
POLONIÆ JUNGITUR  
PRUSSIA, INDOLE.

QVAM  
MODERANTE  
VIRO

NOBILISSIMO, CONSULTISSIMO, ATQ; EXCELLENTISSIMO,  
DN. SAMUELE FRIDERICO

SSSSSSSSSS/

J. U. D. EJUSD. AC HISTOR. PROF. PUBL.

NEC NON

ATHENÆI GEDANENSIS INSPECTORE,

IN

AUDITORIO ATHENÆI MAXIMO,

A. O. R. MDCCXXVII. D. VIII. MAJI,

PUBLICO AC PLACIDO ERUDITORUM EXAMINI

SUBMITTIT

RESPONDENS

ARNOLDUS DILGER, Ged.

G E D A N I,

TYPIS THOMÆ JOHANNIS SCHREIBER,  
SENATUS ET ATHENÆI TYPOGRAPHI.

2359 Prut



15803 I





L. N. I.  
DE UNIONIS, QUA PO-  
LONIÆ JUNGITUR  
PRUSSIA, IN-  
DOLE.

§. I.

BIBLIOTHECA  
VNIV. MAGELL.  
CRACOVIENSIS



*Majores nostri, alloquuntur, in Comitiis Coronationis, Henricum Regem, Pruteni, animo bene deliberato, ad Poloniam inclytum hoc Poloniæ Regnum, libera deditione & sua sponte, nulla vi, nullisq; armis, aut externo metu coacti, accesserunt, certis interpositis pactis & conditionibus, ut Regno quidem Poloniæ incorporati, peculiarem tamen & separatam Rempublicam haberent, suisq; Juribus & Consuetudinibus, cum quibus ad hoc Poloniæ Regnum accesserunt, liberè & sine alicujus impedimento uterentur. (\*) Hæc vera & genuina Unio.*

(\*) Vid. Hist. Pruss. T. III. Doc. p. 39.



Unionis Prussiam inter & Poloniam indoles, quam ad normam Juris publici, emanatarumque inde consuetudinum, fusius describendam, mihi sumsi.

*Quomodo  
Prussi sub  
Imperium  
Regis Polo-  
nia vene-  
runt.*

§. II. Prussiam, renunciato ob Tyrannidem Equitibus Teutonicis obsequio, sua sponte deditionem Casimiro Poloniæ Regi fecisse, scriptores, tum domestici, tum extranei, uno veluti ore, memorant. Soli, qui superioris ævi monumenta negligunt, invidiaque in gentem nostram laborant, bellum fingunt, quo victi Prussi, leges Polonorum subire necessum habuerint. Libera hæc deditio, exhibitis receptisque conditionibus, peracta, solennique Diplomate, quod rectius Pactum Deditionis, (\*) quam, ut vulgo audit, Incorporationis Privilegium vocares, roborata. Nec alio modo juncta est Poloniæ Provincia nostra, ac in fidem Regis concesserat, idem enim actus, qui Genti Regem constituit, vicino Populo sociavit.

*Capita  
spontaneæ  
Deditionis.*

§. III. Juvat conditiones, iisdem, quibus in allegato Pacto Deditionis occurrunt, verbis recensere. Assumit & acceptat D. Casimirus omnium incolarum Terrarum Prusie in Terra marisq; sitarum, benevolam & spontaneam deditionem, regimen, tutelam, Gubernationem, subjectionem, obedientiam, Terrasq; & dominia prædicta, Regno Poloniæ re-integrat, indiscerat & incorporat, & ad usum participationemq; omnium honorum, jurium, libertatum, & prærogativarum, quibus Prelati, Barones & Nobiles Regni Poloniæ hæcenus potiti sunt, & signanter ad futurorum Regum Poloniæ, quotiescunque super electione & coronatione fieri

(\*) Ita & in Scripto quodam, Regi Sig. Augusto exhibito, vocatur. V. Doc. T. n. Hist. Pruss. p. 4.



fieri deliberationem contingat, electionem & coronationem admittit, annectit, & includit. Promittit idem Rex, pro Se, Heredibus, ac universo Regno Poloniae, quod predictas Terras & dominia, favore, gratia, benevolentia & affectione prosequatur, & contra quas-cunque adversitates, impugnationes quorumcunque hominum, illis prestabit Regalem assistentiam & defensam, nec illas a corpore & integritate Regni Poloniae alienari, sequestrari, & scindi patietur. Promittit insuper, quod singulos incolas Terrarum predictarum Prussiae, in juribus, libertatibus, literis, monimentis eorum, quae à Principibus Spiritualibus & Secularibus, Regibus & Dominis Terrarum predictarum obtinent, conservabit, fovebit, & defendet, nec unquam ea violabit aut pravaricabitur, aut violari vel pravaricari quomodolibet permittet. Ut autem liberalitatis, aequitatis & justitiae Ejus dexteram, in his subjectionis eorum & Ejus acceptationis felicibus primitiis, sentiant in universos & quemlibet eorum effusam, Daciam, quae in vulgari *Pfund-Boll* dicitur, item omnia telonia in aquis & terra, nova & antiqua observantia, in Terris duntaxat predictis Prussiae, quomodolibet constituta, Regia munificentia tollit, abrogat, deponit, ac solutionem illorum perpetuis temporibus resolvit, dimittit & relaxat, nullo unquam tempore, per Se aut Successores Ejus, Poloniae Reges, ex quacunque causa aut occasione instituendam & imponendam. Item pollicetur, quod res & bona, cujuscunque ponderis & valoris existant, earum Personarum, quae maris naufragio periclitabuntur, nunquam per Se aut Officiales Suos petet aut requirere, sed illas absque diminutione per eos, quorum ante naufragium fuerunt, aut eorum propinquiores, demonstratione evidenti propinquitatem probantes, colligendas, & in usus beneplacitos decernit convertendas. Item omnes in-

A 2

colas



colas Terrarum predictarum, hac etiam prosequetur prerogativa, & <sup>et officia</sup> impoſterum conſtituenda, item Cajera & Torutas Civitatum & locorum, nulli extraneo, aut forenſi, ſed proprio indigenæ, juxta obſervantiam aliarum Terrarum Regni, conferet. Item omnes cauſas notabiles, dictas Terras concernentes, cum communi Conſiliariorum Spiritualium & Secularium, Nobilium & Civitatum majorum conſilio Terrarum predictarum tractabit, terminabit, & definiet. Item Terras predictas in ſuis antiquis gadibus, limitibus & terminis conſervabit, tuebitur & defendet. Item uſum Juriſdictionis, Magdeburgenſis, Culmenſis, Poloniceſis hereditarii & Prutenici, in decidendis quibuſvis quaſtionibus, & adminiſtratione Juſtitie vult firmum eſſe, & perennem. Item vult, ut in Thorun, Danzig, Elbing, Königsberg duntaxat guerra præſenti durante, moneta Terrarum predictarum impenſis, pace autem ſecuta, tantum in Thorun & Gdansk, Regalibus impenſis, cudatur. Præterea, Nobiles Viros, pro Pruſſiæ tuitione & gubernatione, ad Sux duntaxat beneplacitum voluntatis, ac cum conſilio Prælatorum, Conſiliariorum, Civitatum majorum, prædicta Terra deputabit, ad quos in ſua abſentia ſuper quolibet defectu aut eventu, habeatur reſuſus, providentia, proviſione, & auctoritate illorum ſupplendus & emendandus. Denique, Mercatoribus Terrarum Pruſſiæ, in Regnum, Ducatus, & Dominia Regia venientibus, hanc libertatem & prærogativam vult conſervari, ut quoties illos in quæcunque loca, Civitates, & oppida Regni & Dominiorum Regionum, venire cum mercibus eorum contigerit, licitum erit eis, hujusmodi merces in loca, teſtudas, & cameras, & redita, quorum illis libera præſtari debet arendatio, deponere, & pro ſuo arbitrio exponere in ve-

nalita-



malitatem, stratasque omnes, versus Hungariam, Russiam, Moraviam, Silesiam, Austriam, Bohemiam, Wallachiam, liberas habebunt, de jure tamen teloniis, & stratis antiquis Civitatum Regni semper salvis.

§. IV. Ex his tria notare lubet. Primum, habuisse suas *Novis donata Prussia* leges, sua jura Prussiam, antequam ad Regnum Poloniae accederet, eademque sibi servasse. Deinde, *Privilegiis, libertatum & prerogativarum* Regni Poloniae, participem factam. Tertio, novis donatam *Privilegiis, quae sigillatim recensentur.* antiquis tamen salvis.

§. V. Inde sequitur, Unionem cum Regno Poloniae, jura *Hoc fundamento Unio* Provinciae non sustulisse, quin potius roborasse, neque Prussiam aliter ad usum Prærogativarum Poloniae admissam, nisi in quantum suis haud derogarent. His limitibus, æterna *Polono-Prutenica innititur.* utriusque gentis conjunctio circumscribitur, quos aliqui eoque turbare conati sunt, ut, solo relicto nomine, ipsam Poloniam in Prussia constituerent.

§. VI. Non ad horum ingenium D. Casimirus *Norma regiminis, quam D. Casimirus instituit,* nostram ordinavit Rempublicam. Ipse, Provinciae suum Gubernatorem præfecit, cui quatuor Palatinos, indigenas omnes, junxit, qui, adhibitis Prussiae Consiliariis, publica negotia tractarent conficerentque, addito peculiari Sigillo, cum inscriptione: S. Gubernatoris Prussiae. Consilarii ab Ordinibus lecti, Gubernatore Palatinisque in eorum numerum receptis. Penes hos, absente Principe, Majestas & imperium, nisi quando è re videretur, universam Nobilitatem, minoresque Civitates convocare, iidem qui sub Equitibus Teutonicis Conventus, idem contribuendi modus, eadem Judiciorum forma; hoc saltem discrimine, ut, cum *olim*



olim Magister ~~nam~~, Rex, quod in Polonia debebat, plerumque per Legatos agere. ipsique Proceres, nonnunquam Regi, missis Oratoribus, publicam salutem commendarent. Nulla adeundi Comitia Regni necessitas, nulla Consiliorum cum Polonis communio, nisi pro ferendo, quod ex pacto debebatur, Prusis auxilio. Ita utraque gens sub eodem Principe perenni fœdere coaluerat, ut neutra, relictis Patriis moribus, in alterius leges transiret. (\*)

*Et confir-  
mavit.*

§ VII. Ratum hoc voluit, qui olim pepigerat, D. Casimirus, dato, anno, supra millesimum quadringentesimum septuagesimum, septimo, Diplomate, in quo edicit: *Se, anteactis annis, certa Privilegia & libertates subditis suis & Terrarum Prusis incolis, tam Spiritualibus, quam Secularibus, dedisse & concessisse; quæ quidem Privilegia & alia diu & ab antiquo per eos tenta & habita, ipsis subditis suis, in omnibus punctis, conditionibus, articulis & clausulis, tenere & observare promittit & pollicetur.*

*Cujus exem-  
plum Joannes Albertus,*

§ VIII. Patris exemplum, anno nonagesimo quarto, decimi quinti Seculi, Filius & Successor, Joannes Albertus, secutus est. *Ex certa nostra scientia, inquiens, præhabitaque sufficienti deliberatione, animo benevolo, & voluntate nostra ultronea, ipsis Prelatis, Comitibus, Baronibus, Dignitariis, Officialibus, Militibus, Proceribus, Nobilibus, Civitatibus, & earundem communitatibus, ceterisque subditis & incolis Terrarum Prusis, cujuscunque status conditionisque existant, quæque ipsorum jura & privilegia, tam ecclesiastica, quam secularia, quæcunque, a divæ memoria Regibus Polonia, & ab olim Genitore & Prædecessoribus nostris, super quibuscunque*

(\*) Conf. Schutz L. V. Chron. Proll. & Lengnichii Norma Regiminis Pr.



buscunq, bonis & libertatibus habere dignoscuntur & habent, sub quibuscunqve datis in vita ipsorum emanatas & concessas, emanataq, & concessa Jura & Privilegia in se continentes, in omnibus eorum positionibus, conditionibus, articulis universis, ratificamus, gratificamus, approbamus, & presentium literarum patrocínio confirmamus, decernentes, easdem eademq, robur habere perpetue firmitatis. Promittentes insuper in verbo nostro Regio, & tenore presentium spondentes, eadem imposterum Jura, libertates & Privilegia per omnia rata grata habere, & inconcusse, jugiter, inviolabiliter & perpetuo, Justitia mediante, gratiose conservare.

§. IX. Idem, anno millesimo quingentesimo vigesimo & Sigismundus I. secus.  
 primo, Rex Sigismundus præstitit: Auditis, ait, & bene intellectis supra scriptis Privilegiis, Juribus, & Prærogativis, concessionibus & donationibus, ad laudem & gloriam imprimis DEi opt. max. omniumq, sanctorum Ejus, & ad universum Terrarum nostrarum Prussie incrementum, tranquillitatem, quietem, stabilitatem atq, conservationem, supra scripta Privilegia ac Jura, prærogativas, concessionnes, donationes & exemptiones, ac omnia & singula in illis contenta, cum omnibus & singulis ipsorum punctis, clausulis & continentis, prout jacent, ex certa nostra scientia & voluntate, ex Consilio Consiliariorum nostrorum, ad præsens in hoc novissimo Condentu Nobiscum existentium, præsolita benignitate nostra Regia, approbamus, ratificamus, renovamus, laudamus & confirmamus, ipsaq, & ipsas perpetuum firmitudinis robur obtinere volumus. Promittentes insuper in verbo nostro Regio, & sub fide boni, legalis & ingenui Principis, pro nobis & Successoribus nostris, nos omnia



omnia supra scripta in præinsertis Privilegiis expressa, firmiter & inviolabiliter observare, tenore presentium mediante.

Ad idem Sig.  
Augustus obligatus.

§. X. Non in hoc acquievit memoratus Rex Sigismundus, sed simul Serenissimum Filium, ut idem olim faciat, adstrinxit. Pollicemur illis, Status & Ordines Terrarum Prussiæ intelligit, presentibus literis Nostreis, quod, quandoque ipse Serenissimus Filius Noster, post mortem nostram ad ætatem legitimam, nempe ad annos quindecim completos perveniens, Possessionem Regni & Dominiorum Nostrorum adire voluerit, tenebitur, illis id totum præstare, quod Antecessores Nostri, Reges Polonia, & Nos ipsi præstitimus ex debito, ad quod Ejus Majestatem, ut Filium & Successorem Nostrum tenore presentium obligamus. Et quam diu huic debito officio suo non satisfecerit, ipsi universi Status & Ordines earundem Terrarum & Civitatum nostrarum Prussiæ, ad servandum juramentum suum, quod Majestati suæ præstiterunt, non erunt adstricti, neque obligati (\*).

Confirmatio  
Privilegio-  
rum & De-  
claratio Ju-  
ris jurandi  
Poloniæ præ-  
stiti, à Si-  
gism. Au-  
gusto impe-  
trata.

§. XI. Sigismundus Augustus, delato ad Ipsum post Patris obitum Imperio, in Comitibus Petricoviensibus A. 1549. Prutenis non solum sua Jura, servatamque hætenus Regiminis normam, singulari Diplomate firmavit. (\*\*), verum insuper Declarationem ut vocant, præstiti A. 1537. Ordinibus Regni Juramenti, tradi curavit, in quo, pro liberatione fidei Divi Parentis, & securitate Terrarum Prussiæ testatur, dictum Jusjurandum non alio sensu à se intellectum esse, quare

(\*) Quæ recensui Regum Diplomata, in Privilegiis ut vulgo vocantur, Municipalibus Terr. Pr. exhibentur.

(\*\*) Vid. Histor. Pruss. T. II. p. 25.



quam ut etiam ad Terras Prussiae pertineret, ipsaque Terra cum suis subditis in illo essent comprehensæ (\*).

§. XII. Hæc non alio fini in unum congesti, quam *Polonorum* ut constaret, Serenissimos Poloniæ Reges, usque ad Sigis- *adversus* mundum Augustum, ad observationem, confirmationemque *Prutenam* Jurium Prutenicorum, tum antiquorum, tum per dedi- *libertatem* tionem recens acquisitorum, obligatos se credidisse. Non *motimina.* eadem Ordinum Regni æquitas, qui, Unionis vocabulo abusi, eo allaborarunt, quo Gentem nostram, moribus suis viventem, legibus Polonicis submitterent. Cum A. 1472. in Comitibus Petricoviensibus, de continuando, quod erat cum Hungariæ Rege, bello deliberaretur, non solum instabant Senatores, ut, qui ex Prussia ad Regem forte aderant Legati, in medium consulerent, verum etiam, veterem illam prærogativam, quâ Prutenis licebat, Conventus sibi suo arbitrio, Principis ne quidem consensu requisito, indicare, & quam ipsi Crucigeri intemeratam reliquerant, subvertere conabantur (\*\*). Hoc quamvis non succederet, toti tamen ex hoc tempore in eo fuere Regni Ordines, ut Consilium Prutenicum Senatui Polonico jungeretur, singula negotia, sive Prussiam, sive Poloniam respicerent, accersitis eo Prutenis, in Regni Comitibus, more ibidem recepto, tractarentur, ut utraque gens eadem subiret onera: bene gnari, hoc peracto opere, cætera, quæ Gentem nostram à Polonis distingverent, veluti fundamento destituta, sponte ruitura.

§. XIII. Tenacior antiquæ libertatis Majorum ætas, *Quibus sua* non tollere permisit, quæ olim magno impendio bene con- *fura oppo-* stituta erant. Inductæ servatæque sub Equitibus Marianis *suerunt* *Pruteni.*

(\*) Priv. Munic. Terr. Pr. circa finem, & Hist. Pr. T. II, Doc. No. 5.

(\*\*) Schützels sub initium Lib. VIII. Chron. Pr.



consuetudines, Jura tum prisca, tum recentiora, Pactum Deditionis, Regum juramentis roboratæ sponfiones, & alia, quæ occurrebant, iis opponebantur, qui his destituti, ad utilitatis novæque cujusdem fraternitatis leges, rationes suas subducebant. Inde *Unionis, Incorporationis, Inviscerationis* verba (\*), in peregrinum plane sensum torta, quasi integræ Gentis libertas, ex arbitraria unius alteriusque vocolæ interpretatione penderet, nec potius in re tam seria, subsidium ex Jure publico, perpetuæ Consuetudine petendum esset.

*Spondet Polonis Sigismundus I. novam Prussorum Unionem.*

§. XIV. Vicit tamen adversariorum pervicacia, ut insciis Prutenis, Sigismundus I. A. 1510. & 1539. operam se daturum promitteret, quo Terræ Prussiæ ad Unionem Regni redigerentur (\*\*). Non ergo erat Unio, quæ sub Casimiro coaeluerat, & quam sexaginta fere annorum series firmaverat? Utique erat, at non qualis placebat Polonis. Arctius hi desiderabant vinculum, quod Prussos, non tantum, ut hactenus, Regi Poloniæ, sed simul Regni legibus subjiceret.

*Pacto Deditionis contrariam.*

§. XV. Bonum factum! *univit, incorporavit, invisceravit* D. Casimirus Poloniæ Prussiam, tanto tamen inter utramque relicto discrimine, ut post aliquot annorum intervallum, alia flagitaretur unio. Nihilominus, unio illa antiquior, ad normam mutui pacti perfecta, cui, si nova substituenda, à Pacto recedendum erat, quod, nisi utriusque paciscentium consensu, fieri haud posse, ipsa docet ratio.

*Quam tamen Ipse non perfecit, sed Filio commisit.*

§. XVI. Usus hac æquitate Sigismundus Rex, nihil pro imperio statuit, sed indicto ad hoc Conventu, Prussos flectere

(\*) De vera earum significatione, v. Lengnichii Norma Reg. Prut. §. 8, 10. seqq.

(\*\*) Prilufius Stat. L. V, C. I. art. 2. Herburtus Stat. p. 522.



flexere conatus est, ut, Pacto Deditionis posthabito, se sponte sua ad mentem Polonorum componerent. Quod cum irritum cessisset, ipse Rex A. 1521. veterem Regiminis Normam peculiari Diplomate roboravit, cujus verba §. IX. descripsi. In hoc tamen placere Polonis voluit, dum A. 1529. negotium, quod ipse perficere nequiverat, Filio Sigismundo Augusto committeret, licet anno sequenti, Eundem Serenissimum Filium, ad ea sancte servanda, quæ cæteri olim Reges Prutenis præstiterant, obstringeret (\*).

§. XVII. Longum videbatur Polonis, negotium post Sigismundi I. obitum differri. In Comitibus Coronationis Sigismundi Augusti, A. 1530. orabat nomine Senatorum Archi-Episcopus Gnesnensis Regem, curaret, ut Prussia, unum cæteroquin cum Polonia corpus, eadem cum Regnicolis penderet Contributiones, pariaque cum iis subiret onera, nec pateretur, in his aliisque peculiare quid sibi arrogare. Nolebant, qui ex Prussia Cracoviæ aderant Legati, de Privilegiis contendere, sed id curabant, ut res hæc in deliberationem omnium, qui domi remanserant, Ordinum, veniret (\*\*). Quorum nomine, anno sequenti, ex Conventu Mariæburgensi responsum: *Non ignorare Dominos Consiliarios Regni, Terras Prussie, etiam sub Ditione Ordinis existentes, ac semper usque in præsens, non solum præscripta consuetudine & observantia, sed etiam peculiaribus super hoc concessis Privilegiis munitas, & conservatas fuisse in immunitate talium expeditionum, quas extra Terras Prussie fieri contingeret, ad quas, vel personaliter faciendas, vel suppetiis juvandas, si quando ipsi Pruteni requisiti fuerint, semper se* *Nilominus in Comitibus Coronationis Sigismundi Augusti,*

B 2

hujus-

(\*) Vid. supra §. X.

(\*\*) Histor. Pruss. T. I. p. 19.



hujusmodi suorum Privilegiorum, & antiquorum Jurium præsidio tutatos esse, & immunes permansisse. Nec posse eosdem Dominos Consiliarios ignorare, Terras Prussie, non gratuita liberalitate Principum, non simplici concessione aut dissimulatione, sed præcedente Tractatu, sed pactis intercedentibus, sed meritis suis, etiam sanguine & bonorum jactura paratis, has sibi libertates & Jurium confirmationes redemisse, cum videlicet ipsarum Terrarum Ordines, se, Terrasque ipsas, Majestatis Regiæ Parenti, Casimiro, non armis compulsi, sed sponte detulerint, cum esset in eorum facultate, sub priorum Dominorum potestate permanere. Debere ergo considerare Dominos Consiliarios, ipsis Prutenis, tum propter eorum liberalem affectum, & spontaneam dedicationem, tum ex pacto interveniente, jus esse quæsitum in illis, quæ Terrarum Privilegium continet, Privilegiis & confirmationibus, quo minus in illis perturbari debeant, præsertim nullo eorum demerito, cum nec ipsi Principes, qui ea concesserunt, ab eis unquam declinasse, aut aliquid secus tentasse, comperti sint, sed gratiose eos semper in his conservarint. (\*)

Et in Con-  
vencu Ma-  
riaburgensi  
sentata.

§. XVIII. Quod in Comitibus Coronationis, Præsul Gnesnensis, nomine Senatorum, frustra petierat, id A. 1543. omnium Ordinum nomine, in Conventu Mariæburgensi Legatus Regius postulabat, minis etiam additis, Polonos de periculis, quæ tum Regno imminebant, haud consultaturos, antequam arctior illa cum Prussis unio fuerit perfecta. Monebat ergo eos Rex Sigismundus, venirent ad indicta jam Comitibus Consiliarii, mitteretque eo Nobilitas cum libero mandato Nuncios, quo Ordinibus Regni juncti, in com.

(\*) Histor. Pruss. Tom. I. Doc. p. 106.



commune consulerent (\*). At, in Responso Regio Oratori dato, querebantur Prussi, quod, cum Regni Consilarii, pro suis servandis juribus & libertatibus, magna contentione, apud Majestatem Regiam semper agant, non tamen patiantur ea Prutenis, in uno cum ipsis corpore Regni manentibus, esse integra, cum ab aliquot annis, sub Regimine imperantis tum Regia Majestatis conati sint, Terris Prussia extorquere libertatum & Privilegiorum suorum usum. Petebant, ne paterentur Regni Ordines, in eam se abduci persuasionem, ut parem faciant Prutenorum & Regnicolarum conditionem, non solum ob vires, opes, facultates Prutenorum longe inferiores, quam ut possint cum Regnicolis aliqua parte conferri, vel ad paria onera vocari, sed etiam ob immunitates, quas sibi posterisque, Majores virtute & meritis comparaverint, cum tyrannidi, ad multa dissimilia onera & servitutes perpellenti, se subducentes, non bello aut armis, sed spontanea voluntate, inclyto Polonia Regno se subdiderint, non, ut servitutem pristina majorem obirent, non, ut ipsi Regnum defenderent, quæ vel cogitata illos à deditioe absterruissent, sed ut se in libertatem assererent, ut à Regno defenderentur, ut intra suos fines ab externo metu, sub Protectione Regis, essent tuti. - - - Humillime orantes Regem, non solum per viscera JESU Christi & Thronum Regium, sed etiam per incolumitatem & salutem Serenissimi Filii, quem solum post ipsam seniore Regiam, suarum Terrarum moderatorem & dominum agnoscerent, & cujus plurimum interesset, subditos suos, quibus privilegia & Jura integra se servaturum jurasset, in illis etiam conservatos aliquando recipere, dignaretur hac in re Regia clementia & auctoritate, ut hætenus semper fecerat, ita tunc quoque prospicere subditis suis harum Terrarum, ne usque

B 3

adeo

(\*) Histor. Pruss. T. c. p. 150.



adeo in detrimentum Jurium & Privilegiorum suorum, à Statibus Regni incessentur, atque semel cesset hac illorum in eos immitis contentio. - - - Absentiam vero suam à Regni Comitibus ita excusabant, quod, cum res ita ferret, ut nemo vellet à pristinis libertatibus & juribus discedere, aut postulationi Dominorum Consiliariorum, & Equestri Ordinis consentire, non potuerit plena potestas, mittendis Nunciis, ut, Majestas Regia voluerat, concedi: unde & frustra visum, mittendorum Nunciorum suscipi consilium vel electionem, quæ etiam fieri non potuerit, mandatum non habentibus Nobilium & Civitatum pardarum Nunciis (\*).

Missæ cum  
in finem ad  
Prussos Le-  
gatio solen-  
nior,

§. XIX. In Comitibus, Petricoviæ, sub initium anni 1544. habitis, Poloni modum expeditionis bellicæ, adversum Turcam cæterosque hostes sanxerant, ea tamen lege, ut & à Prussis reciperetur. Quod ut fieret, duo Episcopi, tresque Palatini, more plane extraordinario, à Rege in Conventum Mariæburgensem Legati missi, quorum opera tamen, provocantibus iterum ad Jura sua Prutenis, irrita fuit.

Quid sub  
exordium  
Regiminis  
Sig. Augusti  
in Comitibus  
Petric. cir-  
ca Unionem  
actum,

§. XX. Manserat ergo eadem, quæ olim, Reipublicæ Prutenæ facies, cum Sigismundus I. mortalitatem exueret. Vix autem Sigismundus Augustus Regnum capeffiverat, cum in primis, quæ Petricoviæ A. 1548. habebantur, Comitibus, Regni Cancellarius, qui ex Prussia vocati aderant, Consiliarios moneret, „ inirent jam arctissimam illam „ cum Regno Unionem; caperent in Senatu Polonico lo- „ cum, frequentarentque more Regnicolarum Comitibus: id „ merito ab iis exigi, cum Eidem cum Polonis obsequen- „ rentur Regi, ac Regni viribus defenderentur (\*\*). Prussis, scripto

(\*) Doc. T. c. p. 243. S.

(\*\*) Hist. Pruss. T. 2. p. 18.



scripto ad Regem directo regerebant. Grave & intolerabile nobis est, à Consiliariis Regni saepe abduci Principes nostros, ut nos & Status harum Terrarum, ad Regni Comitia advocent, jubeantque nos causas nostras coram Regni Senatu agere. Qua in re cum suspicemur, Majestatem Vestram, nondum satis edoctam de Privilegio nostro, quod disponit, causas notabiles dictas Terras concernentes, cum communi, non Regni, sed Terrarum predictarum, Consiliariorum consilio, tractandas, terminandas & definiendas esse, existimamus, Vestra etiam Majestati incongruum & indecens jam videri, ut neglecto Privilegio nostro, in causis Terrarum illarum, vel etiam aliis Regni negotiis, ad generales Conventus vocemur, habentes binos annuos nobis constitutos generales & legitimos in Prussia Conventus, ad quos Majestas Regia, occurrentibus negotiis, de quibus agendum nobiscum est, Nuncium suum, vel literas mittere, & mandata sua explicare, deque iis tractare nobiscum consuevit, quin & Ipsa coram Majestate Regia nobis constitutis, non aliter, quam in secessu nobiscum agere, juxta dictum Privilegium solet, quod Divus Vestrae Majestatis Parens exactissime semper observavit. At acrius instare Poloni; datam pro Serenissimo Filio Sigismundi Patris fidem urgere; quam nisi liberaret, Regi Regnum abdicaturos minitari. Non idem omnes agitabat fervor. Erant in Senatu plurimi, qui non impetu, sed mora, non solo arbitrio, sed rationibus, opus conficiendum suadebant. Quorum nomine, Joannem Tarnovium, Equior  
Castellanum Cracoviensem, ita inter cætera locutum invenimus. Tarnovii  
Quantum ad conditiones Regi prescriptas attinet, illas interpretandas censeo, ut expedit Reipublicæ. Quod ut expleat Rex, opus illi est, idoneo ad agendum tempore, neque subito coeunt regna, ac in unum quasi corpus redacta, coale-



coalescunt. Opus ad eam rem est, & tempore & actione, non minus accurata, quam longa. Agendi prius sunt Conventus, vocandi Lithuani, conveniendi sunt Pruteni, accersendi Zatorii, denique orandi, monendi, ac omni ratione, ad id omnes sunt appellandi, ut consentire ad communem salutem velint cum Polonis, ad idem esse gente & lege cum illis. Quæ res neque unius diei est, neque unius actionis, neque hujus nostræ sessionis, ut tanta res dicto citius à Rege confici quoant. Equidem hac mente conditiones illas à Sigismundo Patre, de Senatus sententia, Augusto Regi, datas fuisse memini, ut si Is nollet hanc curam suscipere, quo illius divisum imperium, quasi unum existat corpus, tum ea primo ab Illo animadvertenda injuria foret. At, cum Is summo studio ad id, quod promisit, incumbat, ad eamque rem tempus petat, quis tandem Illum conditiuncule prætextu removendum à Republica, & in aliud tempus differendum putet? est hoc quidem in Conditionibus, fateor, præscriptum, ut Rex ante omnia juret imperium, sed tamen ita intelligendum est id; quatenus illi ad eam rem suppeditaverit non voluntas solum, sed etiam facultas. Libera enim Lithuania est, habet suas Leges Prussia, Zatoria etiam jure atque more vidit suo. Quæ gentes cum imperiis atque Magistratibus, & à nobis & inter se distinguantur, ac ita juratum, ut sicut & nos, ad suas leges Augustum Regem habeant, non possunt ad hoc inviti cogi, ut depositis patriis moribus ac legibus, ad nostras leges moresque sese redigant: gratia id ab illis & precibus, non terrore, neque minis impetrandum est. Quæ sane res aperte ostendunt, ut expleat Rex conditiones, tempore illi opus esse longo & longa opera. Plena æquitatis ac moderationis oratio, ita Regi placuit, ut secundum eam se regnare, jus dicere, ac Republicæ providere velle, profiteretur (\*).

(\*) Orichovius Annal. p. 18. 19. edit. Lips.



§. XXI. Ex hoc, id potissimum curabat sig. *significat*  
 Augustus, ut Prutenos, ad ineundam Unionem permoveret, *di Augusti*  
 eumq; in finem anno 1550. eos ad instantia tum Comititia, *perficienda*  
 Petricoviam evocabat, quo cum venire detrectarent, quid de *Unionis cu-*  
 Unione illa sentirent, in Responso Legato Regio dato descri-  
 pserunt: scilicet, *Unionem, ac insimul conjungendarum virium*  
*nexum, qui ab Equestri Ordine Regni, contra Prussicarum*  
*libertatum prerogativas & jura contenderetur, consultum,*  
*non videri, aliqua ratione inire, cum hoc Privilegiis, liberta-*  
*tibus, sancitis, ac antiquis consuetudinibus, à Majoribus*  
*illesim servatis, per manus Posteris quasi traditis, plane ad-*  
*versetur, & in extremam omnium reliquarum Prutenica-*  
*rum Libertatum labefactionem & enervationem vergere ne-*  
*cessum sit (\*)*. Exprobrabat iis hanc eorum absentiam Rex  
 sequenti anno, simul ad alia vocabat Comititia, haud ulte-  
 riorem moram perficiendæ unionis concessurus. „ Id  
 „ enim velle equestrem Ordinem Regni, ac ad præscriptum  
 „ Privilegiorum contendere, Prussos eodem cum Regni-  
 „ colis gaudere jure, ac, quod olim cum iis in unum cor-  
 „ pus coaluere, ad paria onera teneri, earundemque Digni-  
 „ tatum capaces esse „ (\*\*). Hoc moti Prussi, Comititia  
 constituerunt adire, antequam tamen id fieret, ex Con-  
 ventu Mariæburgensi fiduciam suam testabantur, „ præ-  
 „ dentia benignitateque Regiæ Majestatis provisum iri, ne  
 „ quid contra Jura, Privilegia & libertates fiat, neve novi  
 „ quid, contra harum Terrarum Ordines, ab Ordini-  
 „ bus Regni statuatur, supplices petentes, ut, quo Jure  
 „ fuerint, superstite Divo Parente Sacræ Regiæ Majestatis  
 „ Ejus, eodem deinceps etiam esse possint, neque inusitata  
 C *ali-*

(\*) Hist. Pruss. T. 2. Doc. p. 20.

(\*\*) Hist. Pruss. T. 2. p. 62.



„ aliqua & inaudita suis Majoribus onera ferre cogantur,  
 „ cum nihil ejus generis commissum ab illis sit, quam ob  
 „ rem jure suo privari, & ad insveta onera adigi debeant,  
 „ quin potius, qua fuerint Majores eorum fide, studio &  
 „ & observantia, erga Sac. Maj. Illius Majores, eadem &  
 „ ipsi, & erga Divum Parentem Majestatis Illius, & c. a  
 „ ipsam Majestatem Regiam, esse adeo non intermiserint,  
 „ ut accessisse potius, quam decessisse aliquid, ad pristinam  
 „ illam observantiam videri possit, quo majori etiam se spe  
 „ esse, facturam Illius Majestatem Regiam, ut Paternis vesti-  
 „ giis incedat, parique atque Illa clementia, Terrarum ha-  
 „ rum Ordines contra eos tueatur, qui jura libertatesque  
 „ illorum, omnibus viribus oppugnare conentur „ (\*). In  
 „ ipsis autem Comitibus, qui ex Prussia aderant, summo studio  
 „ laborabant, ne instituta de unione disceptatione, Decre-  
 „ tum, quod nisi adversum sperare haud poterant, sibi acce-  
 „ lerarent. Regis æquanimi- tati potissimum debetur, quod res  
 „ hæc in aliud tempus dilata: ac memorant illius anni acta,  
 „ Regem, instituto cum Episcopo Varmien- si, Hosio, secretiori  
 „ colloquio, causas quæ- sivisse, cur Prussi, oblatam cum Re-  
 „ gno arctiorem Unionem, tam anxie aversarentur, ac re-  
 „ ges- sisse Episcopum: „ duplicem esse Unionem, alteram  
 „ subjectionis & obedientiæ, alteram Jurium. Quod si il-  
 „ lam, quæ populos, cæterum diversos, sub eodem Prin-  
 „ cipe junxit, Poloni intelligant, Prussos ex quo ad Regnum  
 „ accesserunt, non solum constanter in eadem fuisse, sed &  
 „ æternum futuros; sin vero hanc, eandem non posse  
 „ fieri, nisi Jura, quæ Prusis hætenus peculiaria, tollantur. „  
 „ Qua explicatione, quid unione sua intendant Poloni, edoctum  
 „ Sigismundum Augustum, operam, quam hætenus, servandis  
 „ suis



suis juribus, impenderant Pruteni, laudasse, memoriæ pro-  
 ditum est (\*). Quod suo tum Episcopus Varmiensis Regi  
 dixerat, mox universæ Provinciæ nomine, habita ad Ejus  
 Majestatem Mariæburgi oratione, perorabat. *Quod Sac.  
 Maj. Vestra*, inquit, nos unionis cum Regno admonere di-  
 gnata est, fatemur ingenue, quid sibi velit hæc Unio, nos non  
 assequi. Nam, si hoc à nobis exigitur, ut simus ejusdem  
 corporis membra, esse nos confitemur, neque caput aliud in  
 terris agnoscimus, quam Sacram Maj. Vestram, & Regnum  
 Illius, omnia prius & facere, & pati parati, quam, ut vel  
 ab Illa, vel ab Regni Illius corpore, nos unquam avelli pa-  
 ziamur, non concessuri mortalium cuique, ut salvam magis  
 velit Sacram Maj. Vestram, & Regnum Illius, quam quan-  
 tum nos id cupimus, neque fortunis, neque sanguini nostro  
 parsuri, si qua id visa fuerit necessitas postulare. Sin autem  
 hoc à nobis contenditur, ut in eo jure vivamus in Terris Ve-  
 stre Sacra Majestatis Prussia, cum quo se, atque illas, Majores  
 nostri sponte sua, Divo Casimiro, Avo Sacra Maj. Vestra, tra-  
 diderunt, quam sit hæc eorum postulatio, qui sunt ejus-  
 dem corporis membra, Vestra Sac. Majestati judicandum re-  
 linquimus. Quamobrem, concludebat Episcopus, supplices  
 à Sacra Maj. Vestra petimus, quo jure, Divo Casimiro, Avo  
 Sacra Majest. Vestra, Terras istas Prussia, Majores nostri,  
 nulla vi adacti, summa sua voluntate tradiderunt, in eo nos  
 tueri & conservare, neque locum eis dare velit, qui nullo  
 merito nostro, nullaque à nobis injuria provocati, nescimus,  
 qua de causa, jura nostra, tanto studio nobis labefactata cu-  
 piunt, cum tamen non eo animo, Majores nostri, ad Regni se  
 corpus adjunxerunt, quod detractum aliquid Juribus & liber-  
 tatibus,

(\*) Hist. Pruss. T. c. p. 31.



*tatibus, verum, quod accessionem aliquam potius ad eam factum iri, persuasum haberent (\*)*.

*Prussorum  
de servand  
antiqua  
unione soli-  
citu.*

§. XXII. Frustra hæc dicebantur. Etenim Rex, solam Polonorum voluntatem prætexens, Prussos, pro con-  
ficienda unione, ad singula fere Comiticia vocare pergebat, donec A. 1562. terminum, quasi peremptorium, figeret, Decretum, absentibus licet Prussis, laturus, prospecturusque quo licet inviti ad unionem compellantur. Hoc moti Prussi, suos ad Comiticia ablegabant, haud tamen alium in finem, quam ut repetitis, quæ in medium aliquoties prolatae erant, rationibus, invisam illam unionem amolirentur. Longum foret, quæ in his Comititiis, in quibus, ut fatebatur Regni Cancellarius, plus furenti Equestris Ordinis multitudini, quam rationi tribui oportebat, acta, recensere: fusius illa in Historia Prusica (\*\*) enarrantur. Id saltem notare libet, Prussos in unionem aliquam novam nequaquam consensisse, sed contradictione solenni interposita, antiquum cum Polonia nexum, salvum sibi servasse. Nova igitur adeunda Comiticia, Prutenis nequicquam querentibus: „ Juribus, Privilegiis, libertatibus, usitatis vetustisque consuetudinibus, „ bellum indici „. Eadem, quæ antea Ablegatis dabantur mandata, ad quæ adeo exarserunt Regni Senatores, ut Prussos læsæ Majestatis reos arguerent, quasi tam atrox crimen esset, avitam libertatem tueri. Cæterum executio Statuti Regis Alexandri, de reducendis ad mensam Regiam, quæ alienata erant, bonis, cui Prussi inviti plane subjiciebantur, ita occupabat in Comititiis Varsaviensibus, A. 1563. omnium animos, ut unio in aliud tempus differretur.

§. XXIII.

(\*) Doc. T. 2. p. 23.

(\*\*) T. 2. p. 225. f.

§. XXIII. Res usque ad Comititia Lublinensia, anni 1569. protracta. Aderant, præter Ordinis Equestris ac Civitatum minorum Nuncios, Consilarii, at hi, non, ut olim, Provinciæ, sed, quod novum erat, suo tantum nomine. Consilarii ad sessionem in Senatu vocabantur, qui octodecim rationibus ostendebant, se ad Senatum Polonicum minime pertinere, additis precibus: „ ne rebus novis vis onerentur, sed potius secundum Jura & antiquas consuetudines, libertates, immunitates, quas apud omnes Reges Poloniæ, conjuncta manu obtinuerint, conserventur. In his enim, post DEUM optimum maximum, ipsorum salutem & solatium unicum verti, cum Libertas cujusque sit altera vita, ne cum summa animorum exacerbatione, & sua, ac Posterorum ignominia priventur. Eadem ratione, se à Sacra Regia Majestate, humillimis precibus contendere, ne ab executione in hac causa, exordium facere velit, sed re bene deliberata, num ad eam sessionem pertineant, nec ne, legitimum Processum inchoare dignetur, ut prius initium actionis fiat, quam executio demandetur, & ut Sac. Maj. Reg. quosdam ex Consiliariis suis, clementissime designare dignetur, cum quibus Pruteni colloqui, & rem omnem probe ponderare possint, quo facto, citius & melius, res omnis ad optatum finem, sine mora & temporis jactura perducatur „ (\*). Nominabat Rex ex Senatu, qui cum Prutenis de sessione, cæterisque, quæ fieri volebant Poloni, privatim agerent. Hi scriptum iis exhibebant, quo allatas contra sessionem rationes, confutare conabantur, cui *Replicam* opponebant Pruteni, eamque in publico Senatorum confessu, Rege

*Quid in  
hanc rem  
in Comititia  
Lublinensibus  
actum.*

C 3 . m . s . 2 . v . 1 . f . 1 . p . 1 .



præfente legebant. Secuta tum de genuino caufarum notabilium, quæ in Pacto Deditionis Prutenicæ memorantur, sensu difceptatio, de quo, cum partes convenire haud poffent, rem Regiæ decifioni Poloni fubmittebant, fatis per-  
*Decretum* fvaſi, non eam à mente ipſorum alienam fore. Hoc me-  
*Regium ibi-* morabile illud Decretum, quod, quia Lublini publicatum,  
*dem in* Lublinenſe vulgo dicitur, Pruffis conſtauit, in quo Rex  
*Pruffos la-* ſtatuit: „ Confiliarios Terrarum Pruffiæ, eſſe Confiliarios  
 „ Regni, inque Senatu Regni locum habere, & vocatos à  
 „ Regibus Poloniæ, in medium conſulere votaſque & ſuf-  
 „ fragia in Senatu Regni, cum Confiliariis ejusdem Regni  
 „ ferre teneri, tam de negotiis Terrarum Pruffiæ, quam etiam  
 „ Regni, cum ſint unius individuiq; corporis membra, con-  
 „ cernentibus: eodem modo & Nuncios Terrarum Pruffiæ,  
 „ inter Nuncios Regni locum habere, una cum iisdem de  
 „ rebus ejusmodi ſimiliter in commune conſulere. Proinde  
 Rex, vigore hujus Decreti „ injungebat atque præ-  
 „ cipiebat, ipſis quidem Confiliariis Terrarum Pruffiæ, ut  
 „ loca ſua omnino inter Confiliarios Regni, ſimiliter &  
 „ Nuncios Terreſtribus Terrarum Pruffiæ, ut loca itidem  
 „ ſua, inter Nuncios Terrarum Regni capiant, deque ne-  
 „ gotiis & Neceſſitatibus Reipublicæ, Regni & Coronæ,  
 „ unanimi & concordi conſilio conſulant: pœna in eos.  
 „ qui mandatis & juſſui Regio, tum & debito officii ſui  
 „ ſatisfacere noluerint, additâ, ſcilicet, Confiliarios Senatoria  
 „ Dignitate, & quolibet officio privandos, atque hac ra-  
 „ tione vacantem dignitatem, & quodvis munus in eos, qui  
 „ huic Decreto morem geſſerint, conferendum: Nuncios  
 „ vero ad omnia, quæcunque in generali Conventu Regni  
 „ ſancita fuerint, cum omnibus incolis Terrarum Pruffiæ,  
 „ ſervanda & ſuſtinenda adductum iri: ita, ut in hoc  
 „ uni-

„ universa tam commoda, quam onera, non secus atque  
 „ ipsi Regnicolæ, ferre ac præstare teneantur (\*), „.

§. XXIV. Æquitatem hujus Decreti, ad examen vo- *Qua circa*  
 care supersedeo, cum hoc egerit *Lengnichius*, in singulari Dis- *Decretum*  
 sertatione, quam Tomo II. Hist. Pruss. præmisit. Illud no- *boc notan-*  
 tasse, ad scopum nostrum sufficit, Regem Sigismundum *da.*  
 Augustum, una cum Regni Consiliariis, Anno demum 1569.  
 statuisse; primo, Terrarum Prussiæ Consiliarios, simul esse Re-  
 gni Senatores, ac in Senatu Polonico, Nuncios vero Terra-  
 rum Prussiæ, inter Nuncios Regni, locum habere; deinde,  
 Prussos Regni Comitia adire, ibidemque una cum Ordini-  
 bus Regni de Negotiis, tum Prussiæ, tum Poloniæ, consul-  
 tare teneri; tertio, quæcunque in Comitii Regni sancita  
 fuerint, simul in Prussia servanda; denique, Prussis cum Po-  
 lonis eadem esse onera, eadem commoda. Inde sequitur,  
 ante Decretum hoc, juncta licet Poloniæ jam quindecim,  
 supra centum, annis Prussia, Prussos neque in Senatu Polo-  
 nico, neque in Conclavi Nuntiorum locum habuisse; Co-  
 mitia Regni haud frequentasse, multo minus de rebus,  
 quæ Polonos respicerent, in medium consuluisse; Prussiam  
 non Polonorum, sed suis Legibus vixisse, ac Nostrates, tum  
 prærogativis, tum oneribus, ab Incolis Regni distinctos  
 fuisse. Quæ si cum Conditionibus (\*\*), quibus Regi  
 Casimiro deditionem fecit Prussia, conferantur, cuilibet  
 patet, Provinciam olim non alio modo Regno junctam,  
 quam ut sub eodem Rege, ad peculiarem normam rege-  
 retur.

§. XXV.

(\*) Doc. T. c. p. 196. 197.

(\*\*) Vid. §. 3.



*Prussorum  
adversus il-  
lud Contra-  
dictiones.*

§. XXV. Lecto in Senatu Decreto, intercedebant (\*) cum Nobilitatis minorumque Civitatum Nuntiis, Prussiæ Consiliarii, obnixè rogantes. „ ne per præsentem actum, ad inviscendos omnes Regni Conventus, adque Sessionem obligentur, sed ut penes Jura & consuetudines suas, clementissime conserventur, ne etiam, quæ in præteritis Regni Comitibus conclusa & decreta sint, vel in futuris Conventibus conclusa & decreta fuerint, sibi, vel iis, quos domi reliquerant, præjudicium aliquod pariant, quibus nec ipsi, nec Antecessores ipsorum consensum unquam accommodaverint, neq; sine Consensu omnium Statuum, & domi relictorum fratrum, consentire possint. „

*Cui tamen  
Equestris  
Ordinis Con-  
siliarii ob-  
temperant.*

At obliti mox contradictionis suæ, Equestris Dignitatis Consiliarii, non solum cum Regni Senatoribus in medium consulebant, sed &, Decretum Lublinense perpetuò observaturos, sacramento se obstringi patiebantur (\*\*). Hoc etiam tempore, Episcopis, Palatinis & Castellanis Prussiæ, certa, quæ in posterum in Senatu occuparent loca, assignata sunt (\*\*\*).

*Non eadem  
ceterorum  
Ordinum  
facilitas.*

Major Civitatum ac Nunciorum Terrestrium integritas, qui consultationibus Polonorum sollicitè abstinebant, ne facto Contradictionibus contrario, Sancitum Lublinense probare viderentur.

*Regni Ordines,  
novo  
plane more,  
Prussis tri-  
butum im-  
perant.*

§. XXVI. Poloni contra, toti in eo erant, ut omnia ad amussim Decreti fierent. Cum enim hætenus Prussi non nisi in Conventibus suis, libero suffragio, contributiones scivissent, in modo memoratis Comitibus, exemplo inaudito, Regni Ordines,

(\*) Protestationes hæ, ut vulgo dicuntur, exhibentur in Doc. Tom. c. p. 197. f.

(\*\*) Hist. Pr. T. 2. p. 393.

(\*\*\*) V. Appendicem Constitut. Comit. Lubl. sub tit. Porządek Rady koronney.

dines, quod sibi constituebant subsidium, simul Prussiae imperabant, singulis Palatinatibus Exactore, qui pecuniam reciperet, nominato. Quid de hoc facto senserint Nostrates, eorum verbis exponam. *Contributio*, inquit, in literis ad Regem ex Conventu Thorunensi datis, Confiliarii, *quam Sac. Reg. Maj. Vestra, cum Ordinibus Regni, in* *Cui Prussi obligum-*  
*tur.*  
*Lublinensibus praeeritis Comitiis sciscere, atque statuere dinata est, ea ratione & conditione, ut etiam ad Terrarum Prussiae Ordines absentes & non consentientes pertinere, non potuit subditos Majestatis Vestrae Regiae, incolas Terrarum Prussiae, non summo dolore ac maerore afficere, quod contra Consuetudinem vetustam & haecenus usitatam, in Terris Prussiae imperata, cum antea Majestas Regia, uti Illius Majestatis Majores, per Legatum suum, ab Ordinibus Terrarum Prussiae, ipsorum mutuo & spontaneo consensu accedente, semper Contributionem soleret obtinere. Cum itaque Ordines Terrarum Prussiae à nobis postulassent, ut ad Regiam Majestatem Vestram, ea de re perscriberemus, Eidem Majestati Vestrae, & ceterorum Ordinum Terrarum Prussiae nomine, humiliter supplicamus, ut ejus Contributionis, ita in nos constituta, actionem, aut amovere à nobis, pro gratia & clementia sua Regia, omnino dignetur, aut certe, si id obtineri non possit, saltem differatur, ut ejus Contributionis severitas consona legibus & consuetudinibus nostris efficiatur, & Maj. Vestrae Clementia, & Ordinum harum Terrarum consensu (\*).*

§. XXVII. Hoc modo, antiqua quasi abrogata, nova *Opera Prus-*  
inducta unio. Prussi, more Polonorum, frequentare Regni Comitia, horum sancitis, citra consensum licet, subjici, *forum, ut*  
novumq; Conventuum genus, ante-Comitiales vocantur, *ea, qua De-*  
*creto Lubli-*  
*nensi sibi im-*  
*posita, amo-*  
*lirentur.*

(\*) Doc. T. 2, Hist. Pr. p. 200.



*Quid cum in finem ipso Sigismundo Augusto,* constitui. Dolebant prisca status everfionem omnes boni, curabantque, ut in integrum restitueretur, Regia clementia Polonorumque patrocínio invocato, cum nullum ex legibus auxilium sperarent. Rex facultatem sibi deesse prætexens, à Regni Ordinibus medelam expectare jubebat: hi restorationem libertatis, quatenus eam Jura Regni permetterent, frigide pollicebantur. Verba, quæ imprudentibus speciosa videri poterant, re tamen inania. Æquior unus ex Nunciis Terreſtribus Poloniæ, qui cæteros Ordines objurgabat, Prusſorum à ſingulis Regibus confirmata Privilegia, ad Normam Constitutionum Polonicarum velle metiri: negabat, poſſe in Comitibus ſtatui, quod illorum Jura infringeret, Tyrannidemque, ac rationi legibusque contrarium nominabat, ſi quis talia auderet (\*). Non tamen hoc Prusſorum cauſam juvabat, qui, cum cæteram operam perdiſſent, nova Contradiſtione, jura ſua tueri ſatagebant (\*\*).

*dein Hen-  
rico,*

§. XXVIII. Inter hæc, Sigismundus Auguſtus, morbis confectus, Kniſſini exſpirabat, ac Prusſis ſpatium recolligendi dabat, donec Succellor eligeretur. In primo, qui tempore Interregni, Mariæburgi habebatur, Conventu, quærebant ex Equeſtris Ordinis Conſiliariis, majores Civitates, num ad antiquam ſub Caſimiro conſtitutam, an vero ad Lublinenſem unionem ſe componere velint. Ambigui aliquantisper Conſiliarii, donec declararent, nihil pro conſervatione jurium non acturos; addebat ſuo nomine Palatinus Mariæburgenſis, non aliam ſe agnoſcere unionem, quam

(\*) Hiſt. Pr. T. 2. p. 417.

(\*\*) Doc. T. c. p. 206.

quam illam, qua post dedicationem juncta sit Regno Prussia (\*). Præterea, Provinciam nostram, non aliis, quam suis velle vivere legibus, datis ad majoris Poloniae Proceres literis, ad mentem omnium Ordinum Consilarii testabantur. Ad ea edicta, inquit, quæ pro publica tranquillitate tuenda, per Poloniæ ex Senatus Regni auctoritate passim sunt divulgata, nos sane, quamquam illa ex commodo Reipublicæ, sancita esse non diffiteri, neque satis magnis laudum præconiis, vigilantiam atque fidem Senatorum Regni efferre possimus, ea tamen edicta per Prussiam proclamare, librisve publicis insinuare, propterea nobis non est integrum, quod non modo antiquissimæ consuetudines obstant, verum ea quoque sit nostrorum Jurium, libertatum ac Privilegiorum vis, ut nihil nobis recipere, nedum publicare liceat, nisi quod communi omnium Prussiae Consiliorum consensu sit deliberatum atque decretum (\*\*). Nec recentior illam unionem, obliviscebantur Prussiae Ordines, cum pro restituendis suo vigori Juribus, certa capita à futuro Rege confirmanda conscriberent. Huc enim spectat §. 5. in quo, novi Principis nomine, ita locutos invenimus: Cum ea Privilegii Terrarum Prussiae verba, quibus Divus Casimirus, prædictas Terras, Regno Poloniae reintegravit, reunivit & incorporavit, contra libertates & consuetudines Prussiae fuerint intellecta, novaque unio introducta, contra præscriptum & plurimis annis receptum sensum Privilegii Terrarum, antiquam unionem in omnibus restituimus, redintegramus, quam etiam Nos, Hæredesque & Successores, perpetuo tuebimur & servabimus, abrogatis omnibus rescriptis, responsis, decretis, declarationibus quibuscumque in-

D 2

gene-

(\*) T. 3. Hist. Pr. p. 5. 6.

(\*\*) Doc. T. c. p. 3.



*genere, aut in specie insuper publicatis, aut publicandis (\*)*. Circa hoc etiam, in Comitii Coronationis Henrici Andegavensis, omne Prussorum versabatur studium, ut recentiori unione abrogata, vetus Reipublicæ rediret facies (\*\*). Sed ea, Prussorum verbis utor, illorum prob dolor! habita, fuit ratio, ut, sive temporum iniquitate, sive adversariorum conatu obsistente, ne quidem responsum impetrare potuerint.

*deniq; Ste-  
phano re-  
gnantibus  
agerint.*

§. XXIX. Præcep̃s Henrici ex Polonia abitus, non sinebat inflicto, sub Sigismundo Augusto, Prutenæ libertati vulneri, manum admove. Servata hæc cura Stephano Transylvano, cui in Comitii Thorunensibus, Anno 1576. Ordines exponebant, Terras Prussiæ, ratione Privilegiorum, longissimo continuoque usu, à Comitii Regni immunes fuisse, ac Decretum Lublinense, non ex controversia partium, imo contra crebras protestationes Statuum & Ordinum harum Terrarum, latum esse: obsecrabant igitur, ut Regia Majestas, Privilegiorum & longissimæ consuetudinis rationem clementissime habere dignaretur (\*\*\*). Idem, ut efficerent, iis, qui A. 1578. ad Comitii Varlaviam proficiscebantur, commissum: & cum Regni Ordines, vocato ad partes Lublinensi Decreto, obstarent, responsum iis, „: Prussos allegatum Decre-  
tum minime afficere; iis enim invitis, nulla ratione, nullave  
„ æquitate, sub nudo Decreti titulo, obtrudi posse, quod  
„ contra Pacta conventa, literis atque sigillis multipliciter  
„ firmata, ac Sacramenti relligione roborata, denique con-  
„ tra id, quod semel utrinq; placuerit, ratum, gratum & fir-  
„ mum habitum fuerit, Prussis semper contradicentibus,  
„ pro-

(\*) Doc. T. c. p. 15.

(\*\*) Hist. Pr. T. c. p. 77. s. ubi & scripta eum in finem Regi exhibita, re-  
consentur V. etiam Documenta ejusdem Tomi, p. 24. L

(\*\*\*) Doc. T. c. p. 65.

„ protestantibus ac repugnantibus, nulla præcedente culpa  
 „ aut meritis, nulla æquabili ratione ac modo, in volentes  
 „ nolentes statutum, nec unquam ab iis receptum sit; cum,  
 „ quod semel in aliquem recte atque ordine, ex merito  
 „ præsertim collatum, ejus auferendi nulla sit honesta ra-  
 „ tio, nihilque in rebus humanis, firmum ac stabile futu-  
 „ rum, si ea, quæ semel pactis conventis firmata, quocun-  
 „ que quæsito colore aut prætextu, altera parte invita, re-  
 „ texi debeant „ (\*). Disputatum deinde aliquoties, de  
 auctoritate hujus Decreti, inter Prussos ac Polonos: sed  
 cum illi multitudine, non rationibus vincerentur, quod  
 semel, licet male, constitutum erat, legis instar perpetuo ob-  
 tinuit.

§. XXX. Præstat recensere, quid imperata Lublini *Quid Unio*  
 Unione, in veteri Prutenici Regiminis Norma immuta- *Lublinensis*  
 tum, quid integrum manserit. Quod Prussi Regni Comi- *effecerit.*  
 tia adeunt; quod Episcopi, Palatini & Castellani, in Senatu  
 Polonico, Equestris Ordinis ablegati, in Conclavi Nun-  
 ciorum sedent; quod denique cum Regni Ordinibus, in  
 commune consulunt; id Decreto Lublinensi debetur. Licet  
 enim Nostrates assererent, inde tanquam ex equo Tro-  
 jano, omnes errorum tenebras, omnesque, quæ mirum  
 in modum Provinciam premerent, difficultates prodiisse, &  
 ortum traxisse (\*\*): licet quererentur, se aut raro, aut nun-  
 quam ex Comitibus domum redire, nisi cum Privilegiorum,  
 libertatum, Jurium & immunitatum diminutione, & sum-  
 mo præjudicio, ac perinde esse, sive adsint, sive absint,  
 cum nulla pene votorum Prutenorum, tanquam paucorum  
 D 3 habea-

(\*) Doc. T. c. p. 74.

(\*\*) Doc. T. 3. Hist. Pr. p. 27.



habeatur ratio, neque semper, quemadmodum in libera Republica fieri debeat, liberæ relinquantur voces (\*): licet etiam Henrico & Stephano, Regibus, supplicarent, ut vetus consiliorum forma restitueretur, nihilominus ea, quæ modo memoravi, in perpetuam abiire consuetudinem.

*Non omnes  
Prussie Ordines inter  
Regni Ordines relati.*

*Quid de  
Civitatibus  
minoribus  
notandum.*

§. XXXI. Sunt tamen plura, quæ priscum morem referunt. Principio, non omnes, qui in Prussia Ordines audiunt, Regni Ordinibus accensentur; Succamerarii (\*\*) enim & Civitates, tum majores, tum minores, neq; in Senatu, neque in Conclavi Nunciorum locum habent, sed sua prærogativa, non nisi in Prussia & inter Prussos gaudent. Dantur ergo in Prussia Ordines, quorum alii simul Regni, alii tantum Provinciæ Ordines sunt; quod de nullo Palatinatu Polonico asseri potest. De Civitatibus minoribus objici posset, perperam illas in numerum Ordinum referri, cum in Conventibus Terrarum Prussiæ, neq; suffragio, neq; sessione gaudeant. Ad quod respondeo, non esse sermonem, de ea minorum Civitatum conditione, ad quam hodie, solo Nobilitatis arbitrio redactas videmus, sed, quæ ipsis, jure, antiqua consuetudine, & Regia voluntate competit. Ut cætera omittam, anno 1655. in Conventu Mariæburgensi, per Oratorem suum declaravit Rex Joannes Casimirus: quoniam Civitates minores, per literas S. R. M. juxta Jura & Consuetudines antiquissimas, ad Conventus Terrarum Prussiæ legitime vocentur, ideo Internuncios earum, ad Consilia eorundem Conventuum, sine ulla præpeditioe admitti, & ab iisdem nullatenus debere excludi (\*\*\*).

§. XXXII.

(\*) Doc. T. c. p. 44.

(\*\*) Loquor de his, quatenus sunt pars Consilii Prutenici.

(\*\*\*) Add. Lengnichii Norma Reg. Prut. §. 28.

§. XXXII. Qui Nobilitatis nomine ad Comititia *Nuncii ex Prussia, generali mandato, & ex generali Conventu, ad Comititia Regni mittuntur.* proficiscuntur, non unius Palatinatus, sed totius Provinciæ Nuncii audiunt, mandatoque generali, quod totam Prussiam respicit, instruuntur. Qui mos, ex illo tempore, quod Lublinense Decretum antecessit, ad nostram usque ætatem servatur, & licet olim per aliquot annorum spatium interruptus, restitutus tamen (\*), quoniam Majores crederent, hoc se medio prisce libertatis reliquias tueri posse. Inde non mittuntur Nuncii, quoties generalis Conventus ante-Comitialis irritus fuerit, ac nefas habetur, si quis ex particulari Conventu, ac unius Palatinatus mandato instructus, Comititia adeat. Testantur Annales, cum in Comititiis anno 1593. Nuncii ex Palatinatu Culmensi, ad mandata sui Palatinatus provocarent, graviter id iis Palatinum Culmensi exprobrasse, eosque adegisse, ut se ad generalem Instructionem componerent (\*\*). Cum anno vigesimo, superioris seculi, Nuncii, ex particularibus Conventibus, particulari Palatinatum mandato instructi, ad Comititia irent, Civitates majores, solenni contradictione, coram actis Civilibus oppidi Radzinensis, intercesserunt, ideo, ,, quod, *ut loquuntur*, in Palatinatibus Terrarum Prussiæ, ,, nonnulli è Nobilitate Terrestris, suo arbitrio consultationes, absque auctoritate S. R. Maj. & sine præsentia ,, Dominorum Consiliariorum Terrarum Prussiæ, præpostere ,, instituerint, & contra Juris communis, in hisce Terris ,, Statibus & Ordinibus præscripti, tum & adversus consuetudines, ab antiquis temporibus receptas, perpetuam ,, observantiam, causas notabiles præfatas Terras, universamque Rempubl. concernentes, tractare & terminare ,, præ-

(\*) Hist. Pruss. T. 4. p. 103.

(\*\*) Hist. Pruss. T. c. p. 155.



„ præsumserint, suasque assertas Conditiones, deputatis  
 „ suis Nunciis, ad instantia Regni Comitum, in vim Instru-  
 „ ctionis injunxerint „. Et anno 1670, quod Generalis  
 Conventus Ante-Comitialis iuratus, Nunciis ex Palatinati-  
 natibus Prussiae, in Comitibus *activitatem* negatam inveni-  
 mus, quod jam olim anno scilicet 1625. contigerat.

*Prussorum  
 autonomia.*

§. XXXIII. Circa modum consultandi, duo ob-  
 servanda veniunt. Unum, Regni Ordines in Prussos, vel  
 absentes, vel invitos, nil posse statuere; alterum, ipsis Prus-  
 sis non esse integrum, in Comitibus quicquam definire, nisi,  
 quod in Generali Conventu ante Comitiali ratum fuerit.  
 Utrumque ex capite Pacti Deditionis, quod de causis nota-  
 bilibus agit, deducitur, utrumque, servasse sibi Prussos ve-  
 terem illam autonomiam arguit. In articulis, qui post obi-  
 tum Sigismundi Augusti, pro futuro Rege conscripti sunt,  
 §. 7. legitur: *Item à Statutis, Legibus, Constitutionibus,  
 Decretis, & Consuetudinibus Regni, perpetuo immunes erunt  
 (Prussi), nec Statutum Divi Alexandri, unde executio de-  
 scendit, nec, si quid præterea vigore Constitutionum, Decre-  
 torum, aut Consuetudinum Regni est introductum, vel im-  
 posterum introducetur, Terras Prussiae obligabit (\*)*. Quod si  
 ergo Regni Ordines, in Prussos quid decernant, hi aut sta-  
 tim in Comitibus, aut in Conventu suo post-Comitiali con-  
 tradicunt, simulque Regem orant, ne, Provinciam alienis  
 legibus submitti, patiatur. Exempla passim occurrunt, im-  
 primis An. 1578. 1591. 1606. 1607. 1647. 1652. 1653. 1654.  
 1655. 1667. 1671. 1685. &c. Quid autem à Prussis in Co-  
 mitibus fieri debeat, id data iis Instructio ostendit, quam si  
 neglexerint, fines mandati miigrasse dicuntur, nec potest

co-

(\*) Doc. T. 3. Hist. Pr. p. 15.

eorum culpa integra Provincia, ad illa, in quæ ante non  
 consensus obligari. Hoc, ut melius constet, dabo Contradi-  
 ctionis formulam, quam Prussiæ Ordines, in Conventu post-  
 Comitiali A. 1671. publicarunt. *Notum testatumque fa-*  
*cimus, inquit, quod, cum in proxime præteritis Regni*  
*Comitiis generalibus, quo potissimum tempore, ex his terris,*  
*ob ruptum precedentem Comitium Conventum earundem gene-*  
*ralium, nulla auctoritate publica Nuncii instructi, vel able-*  
*gati fuerunt, Constitutiones nonnullæ, Provinciæ sive harum*  
*Terrarum Juribus præjudiciosa, in volumen Legum relata sint,*  
*proinde contra hujusmodi Constitutiones omnes, quæcunque*  
*his Terris præjudiciosa sunt, quo minus vigor illarum, in*  
*easdem extendatur, auctoritate Conventus præsentis, Laudi*  
*nostri vigore protestamur.*

§. XXXIV. Singulare est, quod de Contributione *Tributa non*  
 notatur, Polonos in Comitiis, Prussos contra, non, nisi in *nisi in ge-*  
 Conventibus suis generalibus, publicam pecuniam sciscere. *nralibus*  
 Inde in *Instructiōibus* ad Comitium, frequens loquendi mo- *Prussie Con-*  
 dus: ut Nuncii, totum negotium sciscendæ & modificandæ *ventibus sci-*  
 Contributionis, ad Conventum generalem Statuum & Ordi- *scuntur.*  
 num Terrarum Prussie, more semper usitato, sumant, eosdem  
 sub fide, honore, & conscientia obligamus. Imperare igitur  
 extra Conventum, sive Constitutione Regni, sive alio modo  
 pecuniam, non solum inter publica gravamina relatum  
 est, sed & Ordines pendere eam detrectarunt. Hinc in  
 Resp. Leg. Reg. in Conv. Graud. A. 1612. dato, querun-  
 tur,, magnam sibi illatam esse injuriam, eo, quod con-  
 ,, tra mentem & expressam declarationem Nunciorum suo-  
 ,, rum, in universalibus literis Regni, dupla Contributio,  
 ,, non secus, ac si consensus eorum intercessisset, inscripta,,.

E

Et



Et anno præsentis seculi duodecimo, Nunciis suis ad Comititia, in mandatis dederunt: „ exponerent S. R. Majestati, „ insignem, quem per læsa Jura Cardinalia sentiant dolo- „ rem, dum, licet Conventus generalis obtineri potuerit, „ nihilominus in privato congressu, tam anno præterito, „ quam præsentis, sine Illis in Illos, contra normam & for- „ mam Contribuendi solitam, non indicto à S. R. Maje- „ state Conventu, nescitur qua auctoritate, insupportabi- „ les Statibus & Ordinibus indictæ Contributiones, quarum „ postmodum gravissima militaris instituta executio, si- „ mulque insignis pecuniæ summa, sub nomine quitowe & „ grofzowe extorta. Urgerent itaq; Nuncii, ibi, ubi opus esset, „ ut exactarum toties Contributionum ratiocinia reddan- „ tur, ac ne in futurum aliquis similia attentare audeat „. Non semper inter querelas substiterunt Ordines, sed sæpe indignationem solenni Contradictione extare voluerunt. Anno sexto superioris seculi, ex Prussia in Comititiis præsen- tes, dato ad Judicium Castrense Varfaviense scripto, testa- bantur „, quod in dictis Comititiis Contributionem nullam „ promiserint, imo nec potestatem promittendi habuerint, „ sed totum hoc negotium, juxta antiqua Jura & Consv- „ tudinem Terrarum Prusiæ, ad reliquos Status & Ordines „ Terrarum Prusiæ, vigore instructionis suæ receperint, „ Quo circa, si quippiam in contrarium, à quibuscunq; „ iis „ renitentibus, statuatur, se in eo ratione Contributionis „ publicæ contradicere, & nullo modo ad eam obligari posse, „ aut velle, atque ideo tam Senatores Civitatesque Terra- „ rum Prusiæ, quam Terrestris Internuncios, totius Provin- „ ciæ nomine, iterum iterumque solenniter contra prote- „ stari „. Idem anno, quem jam memoravi, 1712. in Conventu Graudentinensi factum, in quo Ordines „ consu- „ lendo

„lendo indemnitati Jurium & Consuetudinum Terrarum  
 „& Civitatum, Laudo Manifestationis, contra indictio-  
 „nem Contributionum, extra Conventum genera-  
 „lem sancitarum, modo de Jure firmissimo protestan-  
 „tur, omnino volentes, ne imposterum ulla ratione in  
 „sequelam indebitus ille modus trahatur, sed memoria  
 „ejus, salva calculatione ratione extortarum summarum,  
 „penitus aboleatur „. Et sequenti anno, in Conventu Ma-  
 „riæburgensi statuebant „, ut imposterum assignationes, ra-  
 „tione solvendarum in hac Provincia Contributionum,  
 „à nemine alio, quam à Thesaurario Prusiæ, & ab hoc,  
 „de nullis aliis, quam unanimi Consensu in Conventu Ge-  
 „nerali laudatis, & jam collectis contributionibus extra-  
 „dantur, & sicubi assignationes aliæ vel aliter extradantur,  
 „pro nullis habeantur. Si vero aliqui præsumperint, assi-  
 „gnationum indebitarum executionem, in Terris & Civi-  
 „tatibus suscipere, Dominos Palatinos serio obligabant, ut  
 „in omnem eventum, mota etiam Nobilitate, ejusmodi  
 „contravenientes coerceant & reprimant „.

§. XXXV. Præterea, habent Prussi peculiares, aliosq; *Modi con-*  
 ac Poloni, contrribuendi modos, qui in *Laudis*, ut vocantur *tribuendi*  
*Contributionum*, describi solent. Quare non tantum *sciscen-* *Prussis pe-*  
*dæ*, sed & *modificanda Contributionis Negotium*, præsentem *culiares.*  
 ex Prussia in Comitibus Nuncii, Suis integrum servant. Im-  
 perante Stephano, discrimen hoc, Ordines Regni tollere  
 conati sunt, verum Prussi testabantur, „ se hanc novam  
 „Contribuendi rationem, salvis Libertatibus & Privile-  
 „giis suis, recipere non posse (\*), „: ac ex Conventu Grau-  
 dentinensi, A. 1578. ad Regem perscribebant, „ non  
 E 2 „ posse

(\*) Hist. Pruss. T. 3. Doc. p. 77.



„posse laboranti tum Livoniæ, commodius medicinam  
 „afferri, quam si secum extra Comitia, pro more & Con-  
 „suetudine hætenus in Terris Prussiæ, ex vi Privilegiorum &  
 „libertatum observata agatur, cum non æqua sit Regni-  
 „colarum cum Prussis contribuendi ratio, nec unquam à  
 „Divis|Majestatis Regiæ Antecessoribus, ob dissimilitudinem  
 „illam instituta, sed Ordinibus Prussiæ, suum semper mo-  
 „dum, suam contribuendi rationem relictam esse (\*), „.  
 Posteriori ætate, Prussos, exigi à se ad receptos in Polonia  
 modos pecuniam, sæpe questos invenimus, quod, ne im-  
 posterum fieret, Nunciis suis ad Comitia Electionis, post  
 Regis Michaelis obitum, quam maxime commendarunt,  
 adeo, ut nulla alia negotia, nisi hoc remoto obstaculo, tra-  
 ctari permitterent. Nolebant ergo hanc *modificandæ Con-*  
*tributionis* libertatem Nostrates deferere, ad quam potius  
 perpetuo provocabant, quoties quid ei contrarium Poloni  
 molirentur. In Laudo Protestationis, quod Decreto cui-  
 dam Lublinensi A. 1642. opposuerunt, asserunt, „ Terras  
 „Prussiæ, ab ipsa ad Regnum accessione, eousque semper  
 „in liberrimo sciscendarum & modificandarum Contri-  
 „butionum usu mansisse, & quotiescunque subveniando,  
 „necessitatibus Reipublicæ aliquas decrevissent, easdem  
 „non ex impositione sancitorum Reipubl. sed liberis ac  
 „spontaneis voluntatibus, pro modulo facultatum, in  
 „Conventibus suis ordinasse & contulisse „. Ac cum A.  
 1660. Thesaurarius Regni, in bonis Regalibus & spiritua-  
 libus, tum & minoribus Civitatibus, à coctione cerevisiæ,  
 & aliam in Prussia inusitatam contributionem exigeret,  
 Ordines publico edicto declarabant, „ vergere hoc in  
 „summum Terrarum harum Jurium & libertatum præju-  
 „diciu,

(\*) l. c. p. 80.

„dicium, proinde haud quempiam ex Statibus & Ordini-  
bus huic oneri subesse, neque Civitates minores illud  
„afficere „.

§. XXXVI. Decreta in Generali Conventu pecunia, *Qui & suum  
habent The-  
saurarium.*  
non Regni, sed Prussiæ Thesaurario traditur. Ex quo enim  
Provincia nostra Poloniae juncta, perpetuo habuit, qui huic  
muneri præfesset, cujus Jura & Dignitatem, contra cujusvis  
impetitiones tueri, Ordines nunquam detrectarunt, adeo,  
ut cum A. 1652. Regni Constitutionibus nonnulla, quæ  
ejus prærogativam imminuere viderentur, inserta essent, ipsi  
in sequent i Conventu *Manifestationem* opponerent. A. 1617.  
orabant Regem, ut Thesaurarium suum à molestationibus  
*Thesaurarii Regni securum & indemnem præstet*, & anno  
sequenti Nunciis suis ad Comitiam commendabant, curarent,  
*ut munus Thesaurarii Terrarum Prussiæ, secundum antiqua  
jura & consuetudinem, in suo vigore & observantia per-  
maneant, & Constitutione vel speciali Privilegio roboretur.*  
Inter Jura, quæ ei competunt, non infimum est, ut nemini,  
quam Ordinibus Prussiæ, rationem accepti vel expensi  
reddere teneatur. Quoties igitur eum in finem ad Tribunal  
Radomienne evocatur, Ordines *incompetentiam* fori, & si  
nihilominus Decretum sequatur, *Manifestationem* publico  
nomine opponere solent. Quod inter cætera A. 1655. &  
1687. contigisse meminimus.

§. XXXVII. Quem ad mentem Juris publici expo- *Hodierna  
Capitatio.*  
sui, contribuendi Ordo, non leviter nostra ætate turbari  
cœpit, imperata Provinciæ nostræ, sine suo consensu, nullo  
habito Conventu, sola Comitiorum anni 1717. Constitu-  
tione, in militum stipendium, Capitatione, quæ, quod  
E 3 fin-



singulis sex mensibus penditur, vulgo *potroczna ptaca* dicitur. Sed sperandum, fore, ut Prusii interruptam antiquam contribuendi consuetudinem, aliquando reducant.

*De expeditionibus bellicis, extra fines Provincia.*

§. XXXVIII. Solent Poloni, non solum pecunia; sed & corporibus suis laborantem juvare Rempubl., quoties Rex, urgente necessitate, universam Nobilitatem, ad expeditionem bellicam convocat. Prusii, qui beneficio *Privilegii Culmensis*, tempore Crucigerorum, extra fines Provinciae suae, in bellum proficisci haud tenebantur, hanc immunitatem, sub Serenissimorum Poloniae Regum imperio, illibatam sibi servarunt. Ut antiquiora omittam, in *Responsio*, quod Legato Reg. in Conv. Mariæb. d. 9. Dec. A. 1621. dederunt, inquit: *Quod ad expeditionem generalem bellicam, extra fines suos, cum incolis Regni, pro ejus defensione, adversus Turcam, Terrarum Prussiae incolae non processerint, id ipsis ad culpam neglecti officii imputari, non sine mœrore intellexerunt. Cum enim omni obedientiae studio, subitissimam suam promptitudinem, Sac. Reg. Majestati & Reipubl. contestari ac declarare, Majorum suorum exemplo diligentissime cupiant & allaborent, eo vehementiorem, quasi intermissi officii culpa, dolorem ipsis adfert, quo gravius Libertas Patriæ, & vetustissima Jura & Privilegia Terrarum Prussiae, eadem in re versari videntur. Imprimis ergo, summa animorum devotione Status & Ordines reverenter petunt, ut S. R. M. benignissime expendere dignetur, non quid Incolae Regni ab his Terris praestari voluerint, sed quid, quantumque illi possint, & quousque juxta Jura sua, more Majorum sint obligati. In expeditionum immunitate, vigore Pactorum cum Regno & Reciprocae Majorum suorum Sponsionis, ipsi sub Maj. Reg. Divis Antecessoribus, liberi permanse-*  
*runt,*

runt, & sub regimine felici S. R. M. Divina favente gratia, Status & Ordines, hucusque salvi conservati sunt, neque auditum est, sive sub Serenissimorum Regum, sive sub Ordinis Crucigerorum imperio, Subditos Terrarum Prussiae, unquam, extra fines Terrarum Prussiae cum Dominis suis, nisi dato stipendio, in bellum processisse, prout luculenter Majorum Antecessorumque monumenta & acta hoc ipsum ostendunt atque attestantur. Anno 1651. Nunciis, qui ad Comititia mittebantur, mandatum, „ rogarent Regem, debitæ humili. „ tatis studio, ut laudatissimo Divorum Prædecessorum „ suorum more & exemplo, Terras Prussiae, circa Jura & „ & immunitates suas, quibus illæ à generali expeditione „ bellica, postpolite ruszenie dicta, liberæ ac exemptæ sunt, „ benignissime tueri dignetur „. Idem Ordines in *Responsio* Leg. R. in Mariæb. Conventu, ejusdem anni dato, repetebant, scilicet, „ expeditioni generali Prussiam, à prima „ ad perinclitum Poloniae Regnum accessione, nunquam „ subjacuisse, quin potius ab eadem, vigore Jurium & Pri- „ vilegiorum suorum, semper fuisse immunem, adeo, ut „ Incolæ fines ac Limites harum Terrarum excedere, nun- „ quam fuerint adacti „. Quod expeditionem generalem intra Prussiae fines attinet, nunquam se subduxerunt nostrates, si quando eam publica flagitaret securitas.

§. XXXIX. Restant alia, quæ Prussos à Polonis se Indigenatus parant. Præcipuum est, quod in Deditionis Pacto contri- Privilegium netur, Jus Indigenatus, quo vacantes in Prussia Dignitates Prussis como ac Capitaneatus, solis in Prussia natis conferri debent. petens. Possem equidem sat amplum catalogum contexere, qui, licet gente Poloni, in Prussia, tum Capitaneatus, tum alia munia obtinuerunt, quod læsum sæpe, non tamen abrogatum



gatum jus nostrum testatur, cum potius illud feliciter hodie imperans REX SERENISSIMUS, Divorum Prædecessorum exemplis insistens, singulari Diplomate A. 1699. confirmaverit: Nos, inquiens, non tantum hæc eadem Jura, Privilegia & immunitates, tanto sudore & sanguine Majorum partas prærogativas, cautiones, Rescripta, Terris & Civitatibus Prussæ, singulariter autem super Indigenatum data, collata & concessa, tenore & vigore præsentis Diplomatis Nostri conservanda, confirmanda & ratificanda esse duximus, prout in omnibus punctis, clausulis & articulis, ut in se sonant, conservamus, confirmamus & ratificamus, sed & insuper fide Regia spondemus, cavemus & promittimus, quod Dignitates tam spirituales, quam seculares, officia, beneficia, castra, tenutas Civitatum & Pagorum, omniaque bona in Terris Prussæ ubique locorum consistentia, & vacatura, juxta obloquentiam eorum Jurium, non nisi veris, nativis, propriis & indubitatis indigenis, & Terrigenis earum Terrarum Prussæ, ibidem genitis & degentibus, de Nobis & Republ. bene meritis, dabimus & conferemus, idque sub nullitate Privilegiorum nostrorum & nominationum, ipsaque incapacitate super secus obtinentes. Ad extremum, contrarias à Divis Prædecessoribus Nostris & Nobismet ipsis factas collationes, in sequelam, exemplum, & allegationem à nemine trahi debere, nec in quopiam Juribus Indigenatus præjudicare posse, vel derogare, firmiter cavemus & declaramus, præsentibus literis Nostris perennaturis. Eadem S. R. Majestas, in Conventu Mariæburgensi, Anno 1713. per Oratorem suum benignissime declaravit, „ Se specialia Jura Provin-  
 „ ciæ Prutenæ, antiqua Privilegia & quasvis immunitates,  
 „ tam Ordini Equestri, quam majoribus & minoribus Civita-  
 „ tibus, legitime concessa, & præcipue Jus avitum Indigenatus  
 „ Pru-

„ Prutenici, sancte servaturam, & manutenturam „ Cum igitur PRINCEPS INDULGENTISSIMUS, vacantes Episcopatus, Varmiensem & Culmensem, illum Andr. Chryf. Zaluscio, hunc Theodoro Potocio, jam Celsissimo Poloniae Primati, utrique Polono, conferret, commendabat Prussiae Ordinibus, ut ambo *ex singulari, super eximia in Ecclesiam DEI & Rempubl. merita, & ob insignem Prosapie claritudinem, respectu,* Jure Indigenatus donarentur, quod A. 1708. in Conventu Generali Mariæb. factum est Ipsiq; Illustriss. ac Reverendiss. Episcopi in literis suis, ut vocantur, *Reversalibus*, fatentur, „ se sine derogatione Jurium & Libertatum, pro veris naturalibusque Prussiae Indigenis esse susceptos „ Idem anno 1712. in Conventu Graudentinensi, *ob extantissima & maxima in Rempubl. & hac Terras merita,* Illustrissimo Dom. Joh. de Stupow Szembeck, supremo Regni Cancellario, contigit, quod Provincia nostra optime agi de Juribus suis confideret, si eorum tutela, non extraneo, sed Civi concederetur.

§. XL. Exiguntur in Polonia telonia: quo onere ne unquam Prussia premeretur, in Pacto Deditionis prospectum est. *Prussia à Hanc immunitatem novo, laudo in Conventu Mariæb. A 1713. vestigalibus libera.* roborarunt Ordines, omnimode volentes, ut in futurum unicuiq; Incolarum harum Terrarum, liberum sit commercium, absque ulla præpeditioe & teloniorum exactioe. „ In casum vero, quod si Exactores Teloniorum Incolas „ harum Terrarum ulterius turbare, ab iisdem telonia exigere, aut alias quasvis depactationes facere non desisterent, Dominis Palatinis, aut eorum Succedaneis, serio „ committebatur, quatenus securitati publicæ invigilando, „ adhibito militæ, ex repartitione ad hasce Terras Prussiae,

F

„ aut



*Quousque  
ad ea, qua  
in Polonia  
penduntur,  
teneantur.*

„ aut ratione contingentis, ad easdem pertinente pede-  
„ strum turba, vel etiam si necessitas postulaverit, mota  
„ universa harum Terrarum Nobilitate, ejusmodi præjudi-  
„ ciosissimis hisce Terris attentatis sese opponant, & avi-  
„ tam harum Terrarum libertatem ab omnibus teloniis  
„ vindicent, cameras teloniorum, in fundo harum Terra-  
„ rum, contra Jura, vel jam institutas, vel si quæ adhuc  
„ institui velint, ubicunque locorum abrogent, impe-  
„ diant, nec etiam ulterius in Civitatibus superintenden-  
„ tes, aut alios officiales teloniorum morari patiantur;  
„ contra vero, omnibus harum Terrarum Civibus atque In-  
„ colis, omnimodam securitatem in libero commercio-  
„ rum usu, sive in terra, sive in aqua procurent, atque ma-  
„ nuteneant. Cujus nomine, Ordines Dominis Palatinis  
„ eorumque succedaneis, omnimodam evictionem firmi-  
„ ter cavebant & promittebant, obligantes se in univer-  
„ sum, in omni termino & foro, communi sumtu &  
„ oppositionibus, integritatem Jurium vindicatu-  
„ turos „. Præterea ex memorato Deditionis Pacto con-  
„ stat, Prusiarum Incolas in ipsa Polonia, non ad alia, nisi, quæ  
„ in Regni finibus antiquitus pendi solebant, obligari vecti-  
„ galia. Hinc, quoties nova exigi cœperunt, provocare ad  
„ vetera Jura Ordines, eorundemque observationem enixis-  
„ sime petere. Unum ex innumeris, quæ extant, dabo  
„ exemplum. Anno 1674. Nunciis ad Comitium Electionis  
„ Regiæ committebatur, „ efficerent, ut omnia nova telo-  
„ nia, in Regno instituta, per Constitutiones abrogentur,  
„ & incolæ Prusiarum cum mercibus & bonis suis, per totum  
„ Regnum, ab omnibus Datis, teloniis, nec non oneribus  
„ cujuscunque nominis, tum & Legibus Regni, non sine  
„ summo Terrarum harum & Civitatum onere sancitis,  
„ in-

„ inductis & evectis, tam in aquis, quam in terra consti-  
 „ tutis, in omnibus stratis & viis immunes conserventur,  
 „ & nulla alia perfolvantur telonia, quam quæ in antiquis  
 „ & extremis Regni limitibus, exterorum Principum Ter-  
 „ ras attingentibus, pro more veteri dependuntur, secun-  
 „ dum Pacta & Privilegia Terrarum Prussiæ adigantur „.  
 Imprimis vectigalia ad Diboviam & Fordanum gravia  
 nostratibus visa, de quibus sæpe questos Acta publica te-  
 stantur (\*). Tempore posterioris Interregni, anno 1696.  
 Nunciis ad Comititia in mandatis datum est, instarent,  
 „ ut juxta antiquissima Jura Terrarum & Civitatum Prus-  
 „ siæ, merces Civitatum à teloniis quibusvis, intra Re-  
 „ gnum, sint liberæ & immunes, & imprimis à Diboviensi  
 „ & Fordanensi camera „. Et cum magnum illud Con-  
 silium, quod Anno 1710. Varsaviæ habitum est, Telo-  
 nium ad Fordanum iterum decerneret, injunctum est  
 Nunciis Anno 1712, *ut in Comititiis, pro omni posse operam*  
*sedulo narent, quo Telonium illud tollatur & aboleatur.*

§. XLI. Habet & Prussia Leges, ad quas litigan- *Leges Civi-*  
 tium controversiæ definiuntur, peculiare: Nobilitas Jus, *les Prussia*  
 ut vocatur, Terrestre, quod Anno 1598. Constitutio- *peculiare.*  
 ne Regni firmatum est (\*\*), Civitates pleræque  
 Culmense, de cujus Correctione multa in Historia Prussica  
 memorantur (\*\*\*). In hoc tamen Prutena Nobilitas Po-  
 lonorum exemplum secuta est, quod se Tribunali Petrico-  
 F 2 viensi

(\*) V. Index T. 4. H. P. voc. Zoll bey Jordan, & Zoll bey Diebau.

(\*\*) Hist. Pr. T. 4. p. 262. & Const. R. A. 1598. Art. Právvá Pruskiego  
 Korrekturá.

(\*\*\*) T. I. II. III. IV. v. Indices.



*Ultima, qua  
dicitur, in-  
stantia non  
eadem, sed  
provocatio-  
nes modo ad  
Tribunal  
Petricovien-  
se, modo ad  
Judicia Re-  
gia fiunt.*

viensi submiserit. Quamvis enim Anno 1578. ituris ad Comiticia, ratione Tribunalis Polonici, non alia daretur facultas, „ quam ut dicerent, Prussos, Juribus, Legibus & „ ordinario Judiciorum modo, ut hactenus fecerint, libere „ usuros (\*), „ ; illi etiam, qui in Comiticiis aderant, profiterentur, „ se in nullum Tribunal novum, extra Prussiam, „ consentire posse „ , additis rationibus: primum, quod longa alia ratio sit Legum & Jurium Provincia nostra, quam Palatinatum Regni. Deinde, dispar ratio Judicium utriusq; instantia, ita, ut absurdum videatur, tot Senatorum secularium & spiritualium sententias, per inferiores Judices denuo cognosci, judicari, sive etiam retractari. Tertio, quod controvertendi diversus Juris Culmensis in Prussia sit modus, quodque lingua germanica omnes causæ in prima & secunda instantia plerumque controvertantur, & conscribantur. Quarto, quod multis Privilegiis Regum Poloniae, Judicia Dignitariis & Consiliariis Terrarum Prussiae confirmata sint, & expresse Prutenis cautum, ut Jure Culmense à suis indigenis judicentur. Quinto, quod in possessione libertatis illius à tempore, cujus non est memoria, imo sub ipsis etiam Cruciferis extiterint. Postremo, quod Judicia caput & fundamentum omnium libertatum sint, quo fundamento loco suo moto & avulso, omnes reliquas libertates labefactari necesse foret (\*\*). Nihilominus Anno 1585. Equestris Ordo ad Petricoviense Tribunal accessit, certis tamen sub conditionibus, inter quas non postremæ erant, ut Prussis secundum leges suas receptasque consuetudines jus dicatur, iisq; integrum sit, si quando è re videatur, à Tribunali ad pri-

(\*) Histor. Pr. T. 3. Doc. p. 21.

(\*\*) l. c. p. 76. 77.

priscum instantiarum ordinem reverti (\*). Quod Stephanus Rex singulari scripto ratum habuit (\*\*), & Sigismundus III. A. 1589. Constitutione Regni roboravit (\*\*\*). Civitates quod attinet, illæ in Comitibus Varfaviensibus, A. 1585. Regem humillime rogarunt, „ ut penes vetera „ Privilegia, Terrarumque Constitutiones, & receptam Judiciorum formam, clementissime conservarentur „. Quod, cum Rex indulgeret, pronunciaretque, Civitates nullius alterius, quam Regiæ Majestatis cognitioni subesse vel posse, vel debere; publico Laudo, in Conventu generali Thorunensi, A. 1585. cautum est, „ inductam à Nobilitate novitatem, Civitatibus in suis Juribus, Privilegiis, „ immunitatibus ac consuetudinibus, nullis temporibus „ præjudiciosam, vel noxiam esse debere „. Mansit ergo ultima Civitatum instantia coram S. Reg. Majestate, nec aliter, nisi ad Ejus Judicia evocationes provocationesque hodiernum legitime fiunt (\*\*\*\*). Unde & Comitiorum Grodnensium superioris anni 1726. Constitutiones, art. *Trybunał gtowny koronny. §. A jáko lege publica cautum est,* evocationes Civitatum ad Tribunal interdunt, & partes ad forum competens, sub nullitate Decretorum, remitti volunt.

§. XLII. Non alia, quam quæ vivente Rege fuit, *Quid circa*  
 tempore Interregni inter Prussiam Poloniamque est unio. *Regimen*  
 Nulla in Provincia nostra Archi-Episcopi Gnesnensis aucto. *Prutenicum*  
 F 3 ritas, *tempore Interregni observandum.*

(\*) Hist. Pr. T. c. p. 452.

(\*\*) Doc. T. c. p. 159.

(\*\*\*) Vol. Constit. p. 514.

(\*\*\*\*) Conferri omnino meretur scriptum, quod sub Tit. Immunitas Civit. Pr. à Jurisdic. Trib. 1718. prodit.



46 DE UNION. QUA POLON. JUNG. PRUSSIA, INDOLE.


ritas, sed quam ille in Polonia, Lithuanique gerit Personam, in Prussia Terrarum Præses induit. Hic Ordinis convocat, Hic Conventibus locum tempusque dicit, Hic capita deliberandi proponit. Nec foedus, Kaptur vulgo dictum, quod Poloni ineunt, Prussiam afficit, verum Ordines, pro conservanda publica tranquillitate, suas leges promulgant, & peculiaria Judicia constituunt. Cætera ita fiunt, ut in Republ. Capite suo orbata, solent (\*).

*Epilogus.*

§. XLIII. Satis de indole unionis Prussiæ & Poloniæ dixi. Junxit Casimirus solenni Pacto Prussiam Regno; usus Sigismundus Aug. Decreto, quo, contradicentibus Prussis, arctius vinculum texeret. Unio Lublinensis, mutavit aliquantum veterem Prussiæ statum, non evertit. Contigisset posterius, si omnia ad amussim Decreti peracta fuissent. Sed, quæ Serenissimorum Regum indulgentia est, vivit suis Legibus Prussia; colit Poloniam, quod sibi æterno foedere juncta; parique zelo opem & consilia in commune confert, quo bene constituta à D. Casimiro compages perennitatem consequatur.

---

(\*) C. Interregna, quæ post. Sig. Aug. & Stephani obitum, T. III. & IV. Hist. Pr. describuntur.



NOBILISSIMO ac POLITISSIMO

DN. ARNOLDO DILGERO,  
DISSERTATIONIS HUIUS DEFENSORI,

S. P. D.

SAMUEL FRIDERICUS Willenberg/

D. & Prof.

**N**on author Tibi sum, nec consilia aut opem  
tuli ad hanc Dissertationem, sed quam,  
ut hic legitur, elaboratam, ad perlustran-  
dam eam, exhibuisti mihi, ita reddidi,  
& quod declinare non licuit, moderamen meum,  
tui, ex cathedra cum Commilitonibus tuis institu-  
endi discursus, Tibi pollicitus sum. A multis annis  
ingenii tui bonitatem, decentemque industriam  
in Jurisprudentiæ studio exploratam habeo, non  
ex subselliorum assensione, fallaci requisitæ attentio-  
nis documento, sed ex alacri materiarum oppugna-  
tarum & defensorum reciprocatione. Hoc singulari  
laudi tuæ dabo quoq; , quod in fortunarum tuarum  
cumulo usus prudentia rectrice, & memor avitæ  
gloriæ, ut ultimus Gentis tuæ, propriis tuis virtu-  
tibus eam conservare annis sis. Speratum Dis-  
cursus tui eventum animitus apprecor, simulq; ut  
DEUS comes in peregrinatione tua, & aliquando  
gratiosus reductor tuus esse velit. Vale. Dab.  
d. XXVIII. April. M DCC XXVII.

G

Fe-



**F**elix ingenium, quo Te natura beavit,  
 Et solers studium, DULCIS AMICE, Tuum,  
 Suspensos nos derinuere, magisne stupenda  
 Sit Tua sedulitas, num vigor ingenii?  
 Sed SPECIMEN PRÆSENS: dubium dissolvit, utrumque  
 Perfectum, testans, omnibus esse modis.  
 Gratulor hinc merito, quævis hinc fausta precando,  
 Acclamo gaudens ausibus hisce Tuis.  
 Jam Tibi cum Patriis mens sit discedere ab oris  
 His Numen coeptis annuet usque, precor.  
 AUSPICE TER SUMMO succedent cuncta, Reversus,  
 Quo Major, magna spe Patriæ exstiteris.

*Hicco Nobilissimum DN. RESPONDENTEM,  
 genere, doctrina, moribusq. elegantem,  
 Amicum suum honorandum amplecti, &  
 abituriienti quævis fausta apprecari vo-  
 luit, debuit*

Fried. Gottl. Fraisch, Ged.  
 Oppon.

---

**I**ch wolt, Geehrter Freund/ von dei-  
 nem Ruhme schreiben,  
 Da Dein gelahrter Mund von flugen Sa-  
 chen spricht,

Doch



Doch selbst die Fama rieß: Laß nur die Ur-  
beit bleiben,  
Wer sich berühmt gemacht, braucht kei-  
ner Verse nicht.

Dieses wolte dem Hn. RESPONDENTEN  
mit aufrichtiger Feder unter Anwün-  
schung alles verlangten Wolergehens hin-  
zu fügen

Daniel Gralath,  
*Opponens.*

---

VIRO-JUVENI,  
Gente ac Mente præstantissimo,  
Amico dulcissimo,  
*Salutem!*

**A**Ntiqua stirpe avitisq; nominibus celebrem esse, glo-  
riosum; gloriosius, propriis gestis florere, nec ma-  
jorum opinione uti; gloriosissimum, & Generis &  
Virtutis splendorem arctissima quadam unione jungere. Po-  
stremum, Amice ut Nobilissime, ita & Doctissime, est;  
cujus luculentissimum exhibes exemplum. Cum enim fu-  
mosa parentum imagines alios insolentes majorumq; ge-  
stis superbientes reddant, tantum abest, ut ventosa horum  
consilia probes, ut potius Natalium splendor ingens Tibi  
sit incitamentum, Nobilissimorum Tuorum Parentum vir-  
tutes ex asse reddendi ac referendi. Affectatam aliis virtu-  
tem & eruditionem, Tibi ingenitam & innatam pæne di-  
xerim: talem enim semper Te geris, quem vituperare ne-  
G 2 ini-



inimici quidem possint, nisi ut simul laudent. Verum,  
quid laudibus meis Te diutius vellico, qui ita eruditionem  
& modestiam misces, ut, cum sis doctus, Te tamen esse  
nescias. Insignius dictorum argumentum est præsens, do-  
cto Marte elaborata, dissertatio: DE UNIONIS, QUA  
POLONIÆ JUNGITUR PRUSSIA, INDOLE.  
Hujus ego contrarium ut assererem, Tibi placuit. Excedit, fa-  
teor, hæc, quam mihi demandasti, provincia ingenii mei  
vires: utut autem maxime excedat, nihilominus tamen  
obsequar Amico, cui in nulla re fas puto repugnare. Jam,  
cum amor terras alio sub Sole calentes invisendi animo Tuo  
penitus sedeat, nihil superest, quam ut Te, in procinctu iti-  
neris stantem voto prosequar. DEUS Te florentem &  
extra morborum pericula positum ita ducat, ut teneris ad-  
huc annis disjunctissimas terras viri firmitate lustrare possis.  
Tandem confecto itinere DEUS Te, postremam inclytæ  
Stirpis Tuæ propaginem, reddat Patriæ, reddat Amicis.  
Abi Dimidium animæ meæ, &, ne de Te, quem ardentis-  
sime diligo, nihil interdum sciam, jucundissimos cum  
amico misce sermones; sic erimus una, sic dabimus invi-  
cem consilia, sic nec animi Nostri, licet terra dividamur,  
dividentur. Vale & ama

Gedani A. R. S. M. DCC. XXVII.

Die XXX. April.

*Tuum Totum*

Christoph. Ernestum Leuschner, Ged.

*Oppon.*

